

# Kerwered 2005

## Ohfang

Gunn Dach ehr Leit, ehr große unn ihr klääne,  
ihr hässliche unn ihr schääne!  
Digge, dinne, schlaue unn dumme,  
alle gar sin in meine Wilkommensgruß met ingenumme!  
Ich begrieße Eich im Reerer Land,  
das mer do die beschd Kerb feiere is Eich jo alle wohlbekannt!

De Aachder unn ich mer honn uns wirrer zammegerafft  
unn do eruff uff die Läder geschafft!  
Mer berichde Eich aus erschder Hand,  
was es neies gäbt im Reerer Land!  
Die Straußbuwe honn wirrer satte Arwet geleischd,  
e klasse Truppe, soweit das Auge reicht!  
De Aachder is de Chef funn denne junge Leid unn mer wollem das ah net vewehre,  
los, losse mol was vunn deiner Truppe heere!!!!

Wann ich mol korz uff die ledschd Kerb gugge,  
sahn ich nor: „GEIL“ unn do druff dun mer direkt mol äner schlugge!  
Drum hewen all Eier gläser in die Heh,  
und trinken mit mir das war jo so schää!

Es ganz Johr honn ich nor zugeheert, was die Leit so hon vezeehrt,  
unn am ledschde Samschdach honn ich mich dann gequeelt.  
Äh Daach Marathon unn die Theme uffs Babier geschmeert.  
Awwer klawen mer, es is werklich jedes Blatt wert!  
Am gleiche Samschdach owend wars vollbracht,  
Alle dolle Theme ware schriftlich in die Redd gemacht.  
Dasjohr muß ich Eich wirrer lowe,  
aach honn mer so manche glowe.  
Hui, ich siehns an eierm Gesicht, Eich werds schunn angschd unn bang  
werd Zeit, das ich jetzt ohfang!

Wolle ner heere was die Reerer so hon geschafft,  
unn was ich so honn do zammegerafft?  
Gut, dann trinke mer noch äner unn die Musik speelt noch e Lied,  
dann wärre die ah net so schnell mied!

## Gefriertruh

Drowwe in de Bäckerei do is immer was los, do bassere die dollschde Dinge,  
 unn die muß ich faschd jedes Johr in die Redd bringe.  
 Do werre jo so manche Lewensmittel vekaaf, die muss mer kühle,  
 das sich net irgendwelche Bakterie drinerumwühle!  
 Deswäje is jo klar, muß so e Kühlschränk odder e Gefreirtruh imme gehe,  
 unn sich die Temperatur konstant im e niedrische Bereich bewehe.

Änes Dachs laaft die Gertrud an die Gefriertruh unn kriecht e großer Schreck,  
 unnedrunner steht e riesegroßer Wasserfleck!  
 E lauder Schrei unn korz met de Hand gefühlt:  
 „Oje das taut, das is jo garnimmi gekühlt!“  
 Do muß äner her, der sich dem Probläm auskennt,  
 unn so isse dann Richdung Delefon gerennt!  
 De Heerer erunner uff die Kurzwahltaschd gedrickt,  
 unn schunn is die Vebindung geklickt!  
 Dem Mann uff de anner Seit hot se dann schnell erklärt,  
 was bassert, wenn die Truh noch länger nimmi gefrärt!

Das Ball de ganz Lade unner Wasser steht,  
 unn sie samt de Truh unner geht.  
 Er soll sich joh beeile, unn glei kumme,  
 das hat der uff de anner seit noch venumme!  
 Dann hot se uffgelleht unn gewaht,  
 bis der guude Mann zu Ihr faahrd!

Uff ämol geht die Deer uff, de Samsel, Melli, Bägger unn Co kumme rin,  
 so, wo soll dann do es Wasser sinn?  
 Die Gertrud hat ganz große Aue gried unn wuschd garnet was se soll saa,  
 wo kumme die dann jetzt her gefahr?  
 „Ich, ich honn die Steuerungsstell informert  
 unn dene vezeehrt was do is bessert!“  
 Awwer ich glaab ich spinn,  
 wie kummt dann das jetzt bei eich schunn in de Kopp eninn?  
 Uff denne Mann fun dererm Steuerungsstell ded se heit noch waade, sie hot falsch  
 gewähld  
 unn dem Samsel am Delefon alles vezeehrt!

Die Musik speelt derer vedutzte Fraa zur Ehr,  
 Die Korzwahltaschde am Delefon zu bediene ist ganz schää schwer!

## Delefon

Es gebt Sache, die hot noch käner geschäft,  
awwer ich honnse trotzdem zusammengerafft!  
Meim Mundschenk sei Mamme hot in de Kisch gestann unn wollt was innfriere,  
dodebei muschd rer jo was bessiere.  
Uff ämol fängts Delefon oh se Klingele un sie geht dran,  
unn anscheinend hat se sich met dem Anrufer gut vestann.

Sie hat delefoniert unn delefoniert, wie das bei de Fraue so is, dauerts lang,  
bis die sich honn an dem Heerer wirrer gefang.  
Während em delefoneere isse los meschert Richdung Truh,  
unn heert als noch am annere Enn der Person zu.  
„Alla dann tschüss ich muß mol noch was schaffe,  
bevor ich do alles veraffe.  
Jo, jo, alles klar, mach ich, ok, ala hob, tschüss!“ . Truh uff, Zeich eninn,  
sunnsch hadd infreere jo kä Sinn.

Unn dann isses los gang,  
die ganz Story hot jetzt ohgefang.  
Owendes hott se do erum geflucht  
unn in jedem Egg es Delefon gesucht!  
„Das gibt’s doch net, was is dann das fer Scheiße,  
honn ich dann e riese Meise?  
Wo is dann das Delefon, das kann doch net veschwinne,  
bin ich dann noch ganz bei Sinne?  
Es leit ned emol uff de Ladestation druff!  
Ach egal, das taucht bestimmt wirrer irgendwo uff.“  
Irgendwann hot se so e Klingele venumm,  
sah mol honn ich se jetzt noch all, das is doch alleweil aus de Gefriertruh kumm!  
Dun jetzt mei gefrorene Hähncher metenanner delefoniere?  
Odder dun ich wirrer fantasiere?  
Nä, sie hots dann gecheckt,  
unn es Delefon zwische ihrer gefrorene Sache entdeckt!

Die Musik speelt derer Fraa zu Ehre,  
es Delefon sollche net ingefreere!

## Hilfe, Maddin

De Winder ich honns als emol erwähnt is in Roth e schänie Zeit,  
 wo sich jedes Johr wirrer jeder driwwer freit!  
 Doch manche duns völlisch veraffe,  
 unn denen macht die Johreszeit ganz schä zu schaffe!  
 Mit dänne Audos im Schnee voranzukomme is e schwierischie Sach,  
 unn hot em Madin im Hinnerseh bees zu schaffe gemacht.  
 Moijens kummdr eraus, oje.  
 Do leit jo alles voll met Schnee!  
 Also erschd emol es Audo frei gemacht,  
 packt mer in 10 minudde, is jo kä Sach!  
 Jetzt steed die Karre so bleed am Bersch,  
 awwer macht nix, ich bin jo net so iwwerzwerch!  
 Es Loch uff, eninn in de Bock, ohgemach, Gang ninn unn ohgefahr,  
 wie jede Morje um die Zeit aach!  
 Doch nix is bassert, kä Milimeder hodder sich beweht,  
 nor die Räf VORNE honn munter dorchgedreht!  
 Macht nix, das wär doch gelacht,  
 do wäre se erschd emol die Räfe frei gemacht!  
 Gesagt getan, eraus unn HINNE an die Schlabbe,  
 Schnee eweg unn jetzt misse die wirrer babbe!  
 Eninn die Karre unn nochemol broweert,  
 doch es wirrer es gleiche bassert.  
 Warum solls dann jetzt annerschder sinn,  
 VORNE die Räf, die Antreiw stehe jo immer noch im Schnee drin.  
 Helft nix, ich brauch jemand mit Erfahrung,  
 unn so isser eninn unn hot sich de Babbe metgenumm.  
 Es Pänsje guggt sich korz oh die Sach,  
 „Das wärd jetzt met links gemacht!“  
 Eninn ins Audo, seim Bub korz erklärt,  
 wie mer in derer Situation wegfährt!  
 Wenisch Gas, viel Gefiehl, so krawwelt mer dann de Bersch enuff,  
 bass uff, ich honn das richdich gut druff.  
 Dann wunnerd der sich wirrer, wie das geht,  
 das der Räf HINNE uffem feschde Teer ohne Schnee druff dorschdreht.  
 Bestimmt e Stunn hodder geflucht, Gas gebb unn browert,  
 Awwer das Audo is äfach net dort enuff marscheert!  
 Uff ämol ein Geisteblitz, so e richdisch gudie Idee,  
 Ich wäs wie mer austrickse känne denne Schnee!  
 Unn so isser dann ganz langsam wie Gott es wollt,  
 die 3 Meder rickwärtz uff die Esswillerer Stroß gerollt.  
 Die Musik speelt dänne Reerer helde zur Ehr,  
 Wenn Situation machmol nor net so unübersichtlich wär!!!

## Kurznachrichten

### Rothselberg

In Rothselberg findet wieder die Kerwe statt. „Schad das de Dobbelweck vorsjohr net genuch Waggelbudding hatt, sunschd hedde mer e Schbeisbitt voll gemacht!“ Sagt Andy, einer der Rothselberger. Wir sind gespannt was wir dieses Jahr von ihm zu sehen bekommen.

### Wartenwald/Selberg

Nachtrag von 2004

Was passiert eigentlich wenn man mit dem Auto auf den Selberg fährt, meint man wäre gelaufen, wieder runterläuft und morgens zu seiner Arbeitstelle will?

Man kommt zu spät!

Herzlichen Glückwunsch Herr Ott!

### Kerweredd

Eine traurige Nachricht muß ich leider auch übermitteln. Der Kerwevater und sein Mundschenk werden dieses Jahr wahrscheinlich das letzte mal auf der Leiter stehen.

Bei einem Interwiew sagten die beiden:

„Schau mer mal“!

### Mitteldorfstraße

Bonenberger Sascha, von den Rothselbergern auch liebevoll „Bullche“ genannt, hat es fast zehn Jahre in Folge geschafft nicht in die Kerwerede zu kommen. Er sagte:

„Mer wärt halt ruischer mem alder!“

Wir warten den Montag ab.....

### Rothselberg Neubaugebiet Pfarracker

In einer langjährigen Forschung wurde festgestellt, das Menschen immer wieder versuchen unmögliches zu Schaffen. Ein Mann hatte versucht mit einem Gegenstand der höher ist aus einem Raum zu kommen, der eine niedrigere Öffnung hat. Hört sich kompliziert an, ist es aber nicht.

Seitdem hat sein Kofferraumdeckel eine andere Farbe als der Rest vom Fahrzeug!

### Wetter

Über das Kerwewochenende wird es heiter bis lustig. Morgens ist bei manchen mit Nebel zu rechnen. Die Alkohohlwahrscheinlichkeit liegt bei 99% deswegen ist es auch scheißegal obs rähnt!

Die Sonne sorgt öfter mal für helle Momente bei 0,8 bis 1,5 Promille.

Und noch die besten Sprüche aus unserm Räumchenbuch 2005

„Ohne Alkohol fühl ich mich so eingeschnürt!“

Zitat Kai

Axel: „Wahre Liebe gibt's nur unner Männer!“

„Vor allem bei mir!“

Zitat Seppi

„Ich wollt nor änie weghaue, jetzt han ich e Freindin!“

Zitat Egge

## Collin Mc Koffer

Im Winder wars, de erschde Schnee is gefall  
unn do hots die junge Buwe nimmi im Haus gehall!  
Schlidde fahre, Schneebäll schmeiße,  
manche baue a emol Scheiße.  
Iwwer äner will ich mol e bisje berichde,  
denne kann mer im Summer als met som e Poloche sichde!  
Fer de Winder muschd e anner Audo her,  
weil der Polo dud sich met dem veele Schnee arisch schwer.

Also hodder sich so e aldes Golfche kaaf,  
No dem Moddo: „Liewer schlecht gefahr wie gut gelaaf!“  
Im Fernseh hodder die Rallyfahrer dorch de Schnee drifte gesieh,  
Was die känne, krien ich wohl ah noch hie!  
Also änes dachs, de Schnee war do, die Karre ah,  
dann wird emol e bisje erum gefahr.  
Wie sich das fer so e Rallyspezialischd geheert,  
lenkt mer nur zu zwät sei gefährt.

„Komm Julia“ hodder noch gesaah,  
du Fahrsch met unn sach mir die Kurve ah.  
Wenn die Kurv scharf is, fangsche oh se kreische, dann konzentrier ich mich uffs  
lenke,  
unn brauch net noch iwwer die Stroß nohsedenke!  
Unn so sinnse dann ans Audo getraabt,  
unn kreischend dorch Roth gestaabt.  
E scharfie links, e leichdie rechts bisje drifte, klasse wie das geht,  
unn em Julia hot sich ball de Mahe umgedreht.

Awwer das mach nix hat sich de Koffer gedenkt,  
unn je noh Kreische sei Karre gelenkt.  
Es Middeldorf unn das is kä Scheiß,  
War vunn de Bäggeri bis an die Kreizung nor Eis!  
De Koffer kummt ganz unfedross  
do farre vor derer Kurv ohgeschoss.  
Es Julia ein leichter schrei, weil so scharf is die Kurv jo net,  
das obwohl se liewer es ganz Dorf zamme geblärrt hett.

Er merkt schunn, ohje, das wärd nix,  
wie erklär ich das jetzt meiner Bix?  
Schnell sahder zum Julia, hodd Dich das Licht vorm Reimche net ah gesteert!  
Unn is voll stoff Richdung Ortlamb mascheert!  
Dann isser mem e laude Knall dort degäje gefahr,  
die Lamb is Owwe runner gefall, unn hot beim Koffer e Loch ins dach geschlaah!

Hot das geschebbert, es hot dorchs ganz Dorf geschalt,  
so e Lambeposchde gäbt ganz schä halt!  
Dänne zwä is nix weirer bassert,  
unn die Pfalzwerke hat ah die Lamb wirrer rebareert!

Die Musikspeelt dem Rallyfahrer zur ehr,  
e Ortlamb auszuschalte is garnet so schwer!

Ich hons vorsjohr ah schunn emol eninn geschafft,  
 unn e Thema vunn vor 10 Johr in de Redd zusamme gerafft.  
 1995 wars, do existiere noch die dollschde Geschichte,  
 unn vunn ähm doll vunn Domols will ich Eich jetzt berichte!  
 Wenn ner mähne, sowas wär schunn vejährt,  
 wärre ner jetzt vonn was annerem belehrt.

## Scheiße unn die Folgen

Do owwe an de Hall do es was bassert,  
 do hotts eneme Hund ausem Neibaugebiet ganz schä bressärt.  
 Wie die Fra am Fenschder denne Hund erblickt,  
 siehtsse graad wierer seine Darm in de Gaade drickt.  
 „So ein Saudier, so ein verreckdes! Oahr, ich kanns garnet glawe!  
 Näwer die Krumbeere unn midde in die Kollrawe!“  
 Die Hausfra in de Kisch, die kanns net veknuse,  
 die rennt enaus; unn will med denne zwä beschdimmt net schmuse!  
 Ruckzuck schdedse draus uff de Matt,  
 die Fra met eerm Hund dengt nor „Bor! Was esen datt?“

Sie kreischd owwe runner:  
 „Mach das die Scheiße aus meim Gaade veschwinnd!  
 Sunnschd grien isch in meim reife alder noch e Kind!“  
 Die Fra met dem Hund die losst sisch erweiche,  
 unn unnerbrecht die Kreischerei metnem friedliche Zeiche.  
 „Ei sei so gut unn geb mer mo e Schipp,  
 daß ich der die Scheiße in ä Aamer kipp!“  
 „Nix gibts!“, schellt se erunner vunn de Drepp:  
 „Ich mach ver disch doch net de Depp!“  
 Alla gut, dengts Frausche unn dreht sisch e rumm,  
 so änie kummt mer noch lang net dumm.

Vunn de Kreischerei noch ganz vunn sinne,  
 fangt die Fra e teuflischer Plan oh se schpinne.  
 „Isch umzeih de Gaade met Schdacheldroht!  
 Nä das kansche net bringe uff ämo falld sisch noch äner Dohd.  
 Aaaaah! Glei honn ischs! Aweih kumm isch druff!  
 Isch drohn ne die Scheiße vorr ähr Deer eh nuff.“

Bei de Familije mem Hund werd grad gemiehtlich samme gesess,  
der Vorfall vunn geschd Meddach is schunn wirrer vegess.  
Uff ämo klingelds, wer kann dann das sinn?  
Ah. De Freind vumm Äldschde will die Deer e rinn.

„Ei ge nowend!“ herd mer sei feschiedie Schdimm erschalle,  
unn glei druff durer a die Hausdeer zu knalle.

Gemiedlich esst grad jeder sei Subb,  
unn do steht er a schun in de Schdubb  
Uff ämo erhewe sisch in die Lüfde,  
faulisch, süße, herbe Dufde.  
Die Aue vor Schreck weid uffgeress,  
werd erschd emo de Leffel in die Subb geschmess.  
Noh kräfdischem Lufde werd erschd de Hund vesorschd  
unn denoh werd noh de Ursache geforschd.

De Freind saht uff ä mo „Isch wäs was es es!  
Do unne an de Sohl sinn mei ganze Schuh veschess!“  
Wie sischs e raus schdellt unns es werklisch so.  
Die Scheiße war vorher noch net do.  
Am Daach devor war se noch 300 Meder weider,  
näwer Krumbeere unn Subbekreider.  
Jetsd muss isch langsam zum Enn kumme,  
denn sunsch dumer nor die Leit ve dumme.

Die Musik schpeeld jets denne Zwä,  
„Ach was kakt der Hund so schä!“

## Reiselust

„Wenn Reerer eine Reise tun...“ so kunnt mers schunn öfters lääse,  
kann mer die Männer dann werklich nix hääse?  
E paar aus Roth hadde er Sache gepackt unn met de Bahn e schöner Ausflug  
gemach.

Sinn jo alles Erwachsene Leit, dann is das jo kä Sach.  
Ich wäs net wo se sinn erummgefahr,  
das kummt awwer a in der Story net so druff ah.

De ganze Dach hadde se sich irschendwo im Lande vekniegt,  
mer wäs jo ah, das Reerer unn Bier net weit ausenanner liegt.  
Doch irschendwann endet auch die schänschd Fete,  
unn mer muss wirrer die Heimfahrt anträde!  
Unn wie mer so am Bahnhof steht,  
unn mer merkt, das die Bahn sich mol wirrer vespeet.  
Do hert mer änner rufe, bevor ich jetzt vor lauder Dorschd kabutt geh,  
kummt mer e sau guudie Idee!  
So isser zu dem Bahnbeamte gang un hot dem sei Probläm erklärt,  
das hat dem awwer nur Stirnrunsele bescheert!  
E Lösung muschd jetzt jo ah her,  
die hatt der dem a klei präsentiert, bitte sehr.  
Mehr gehen jetzt do eniwwer in die Bahnhofskneipe,  
wolle awwer net de ganze Dach dortbleiwe.

Der Zuch, der kummt jo e bisje speerer,  
dann kännsche emol e gefalle duh fer uns Reerer.  
Der soll wanner kummt grad zwämol tude,  
dann dun mer uns spude.  
In derer Zeit känne mer noch e Bierche leere,  
unn derer Kneip e bisje Umsatz bescheere.  
Er war investann unn so sin se in die Kneip geloff  
unn hon dort noch e bisje gesoff.

Em Laub sei Oba, de Edgar, der hat e Heergerät, dass er was vesteht,  
wenn se awwer in de Kneip hogge, wäser, das es a annerschder gehd.  
Unn so hadder das Ding dann halt  
emol bisje ausgeschalt.

Korze Zeit speeder, dud drauß de Zuch tude unn all springe se uff,  
komm mer müsse schnell die Gleise enuff.  
De Edgar rennt enaus unn denkt, ich bin doch net bleed,  
warum soll ich e umweg mache, wens ah iwwer die Gleise geht.

Die Bäh in die Hand unn ab eniwwer,  
wär doch gelacht wenn ich do net käm driwwer!  
So iss de Edgar driwwergesprung,  
unn hot denne Zug der vunn rechts kumm is iwwerhaupt net venumm.  
Im Hinnergrund hert der Stimme unn rufe näwer so nem leichde grolle,  
awwer er denkt: „Laafen doch drummerum ehr dolle!“

Dann siegt die Neugierigkeit unn er bleibt stehe,  
um emol noh denne annere se sehe.  
Die stehe do unn fuchdele wie willt met de Arme erum,  
vunn denne hot der ah die Stimme venumm.  
Doch das Grolle, das kunnt der sich net erkläre, was das is fer e Sach  
was hat dann so e Geräusch gemacht?  
Wie er sich rumm gedreht hat wuschd der wos her kummt, vunn was fer äm geschos,  
do hodder sich nämlich negschd an dem ICE de Kopp ohgestooß!

Der hod wehem Edgar e Vollbremsung hiegeleht,  
weil der midde uff de Gleise schdeht!  
Huch, horrer gesah, das war knapp,  
wie se dehäm ware, hadder faschd schunn wirrer sei normali Gesichtsfabb!

Die Musik speeld dem Edgar zur Ehre,  
dem Heergerät soll mer de Dienschd net vewehre!

## Schillernde Ideen 05

Alle Ähnlichkeiten mit Personen in der folgenden Geschichte sind rein zufällig und von dem Autor so nicht gewollt!

Wie mer Vorsjohr korz vor de Kerb feschdestelle muschde, hon mer in Roth äner  
 Wohne,  
 der dud net emol unser Kerwefeschd veschone!  
 Ich muschd Sunndachs noch e Kerwereddestick schreiwe,  
 weil so hedde mer känne net vebleiwe.  
 Der doll hot uns de TÜV uff de Hals gehetzt,  
 unn fühlt sich wann mer ne in die Redd bringe noch in seiner Ehre veletzt!  
 Bei höhere Stelle in Roth dud der verweile,  
 unn sich bei manche Leid aussheile.

(Eine Runde Mitleid.....ooochhh!)

Ich glaab es wäs jeder wer is gemähnt,  
 an seiner Stell het ich mich ganz schä geschähmt.  
 Awer ah mir dud der läd ich honn e wäsches Herz gried unn mer iwwerleed,  
 das hat alles kä Sinn  
 Deswähe bring ich ne dasjohr grad wirrer in die Redd eninn!!!  
 Dasjohr horrer wirre sei geischdischer Dinnschiss funn sich gebb,  
 das wird awwer glei noch näher beschrebb.  
 Der hodd awwer wärklich jed Johr so SCHILLERnde Idee,  
 do muß mer nur um Gnade flehe!

Näwer seim Grundstick is e Gaarde, der wärd vunn de ner Fraa an de Eswillerer  
 Stroß in dem gälwe Haus uff de Eck vewaltet,  
 das das schöne Grundstick net veraltet!  
 Die hot grad angefang ehr kram do eninn se seehe,  
 unn do sieht se hinnerm Fenschder näwe droh sich schunn was bewehe.  
 E bissje Radisjer, Salat muß a noch debei so kann mer das losse,  
 jetzt stelle mer fer die Bohne noch e paar Sprosse!  
 Uff ämol hodd se was geheert,  
 im Nachbarhaus is grad jemand explodeert!

„Ey du dollie Nudel“ kummt der an de Garde gewetzt,  
 „awei hosche mich awwer ahrisch unnerschätzt!!!  
 Was dusch dann Du in dem gaade Planze??  
 Willsche Dich im Unkraut veschanze???

Ich ruf de Rechtsanwalt, die Bolizei  
un de Bundesgrenzschutz ah noch debei!  
so langsam bin ichs jetzt malaad,  
was Du anrichde Dusch met Deiner Saat!  
Die Fraa an de Eswillerer Stroß in dem gälwe Haus uff de Eck wuschd garnet was der  
hot fer e kummer,  
was soll dann jetzt die peinlich Nummer!  
„Du Bleedmann, honnse Dich so häss gebaad!  
Was soll ich dann ohrischde met meiner Saat?“

„Ich gäbb der glei, das werd sich vor Gericht kläre,  
dann sah ich der was mir das dud bescheere!  
Wann die Radisjer ausem Borem kumme,  
krien ich die sicht uff mei schönes Grunstick weggenomme.  
Die Worzele vunn de Bohne mache irschendwann de Bachlauf kabutt,  
dann honn ich meim Gaarde wirrer e große Flut!“  
Awwer jetzt kummt de Hammer, das is e Schlagkräftiges Argument,  
das mer noch nedemol in de Wissenschaft kennt!  
Der kann Nachts nimmi schloofe, das is Fatal,  
ich mähne, mer is das awwer egal.

Es kann faschd net wohr sinn awwer es weht widder so e geisdischi Briese,  
Der Salat, der ded nachts so laut schieße!!!

Unn das, kann jo wohl garnet sinn,  
wenn jeder Salat planze ded, wo käme mern do hin!  
Ich kann do dodezu ehrlich nix meh sahn unn muss abwinke,  
ich dun lieber mem Achder noch äner trinke!

Geschlossen wird die Akte SCHILLER 05

Die Musik speelt dem schlaue Mann zur ehr,  
wenn alle nor met Salat schieße, wie do die Welt in Ordnung wär!

## De Sell

Es ios schunn e paar Johr her, unn mer hot schunn nimmi an ne gedenkt,  
awwer es hot ne immer noch kühner irgendwo vesenkt.  
De lange doll, in alde Redde als „De Sell“ bekannt,  
kämpft immer noch um e bisje Vestand.

Mittlerweile isser jo vunn Roth e weg gezoh,  
brung hats nix, mer sieht ne immer noch alsemol!  
Med som e alde Bulldog schdaabt der als noch um die Egge,  
das die Leit ehr Kinner im Keller vestecke.

Mem e Dodekopp Fähnche hoggd er dann uff seim Ross,  
mer mähnt do käm e Pirat ohgeschoss!  
Im Winder, wie mer acht meeder Schnee hadde (näwernanner)  
Hat der doll mol wirrer e riese Schadde!  
„Drumerumm“ wie mer Reere sahn,  
das iss wanner do driwwe an de Windrädche enuff Fahrn.

Do wolld de sell mol gugge wie sei Geschoss dorch denne Schnee sich Buddelt,  
awwer eigentlich hodder sei Gedanke mol wirrer ganz schää veknuddelt.  
Drei Meder dief ware die Schneewehe,  
awwer näh, das muß jo irschendwie gehe!  
Dann nämm ich halt de grawe in die Mitte,  
der Schnee uff de Stroß is wärklich bisje hoch, ich muß bitte!

De Grawe awwer hot em was geschiss unn is brärer woor,  
irschend wann hodder dann met seim Bulldog velor!  
Bis zum Hals hodder im Schnee geschdann, mer hot nur noch de Kopp gesieh,  
Das gried a nur „de Sell“ so hie.  
Zu seim Glick hot de Hemmer gesieh denn hoffnungslose Fall,  
unn hat aus lauder Mitleid emol angehall.

Er wollt ne rausziehe, jedenfalls hodders browert,  
awwer dann isses Bassert,  
Em Sell sei Gefährd hodd demm ganze net Stand gehall  
unn iss seitwärts in de Schnee gefall!  
Unn jetzt kummts beschhd,  
de doll sitzt immer noch druff unn halt de Lenker fescht!  
Vielleicht hodder das net kabeert,  
das e Bulldog nur uff seine Räf unn net seitwärts mescheert.

Awwer egal, so geht's jedenfalls net merkt de Hemmer met großem entzügge,  
Mer müsse met schwererem Gerät ohrügge!

So honnse dann de Hansi gehol, der muschd ne mem Bagger befreie,  
dann kunnder wirre uff sei geliebtes Ross steie.

Awwer mol ehrlich, do hedde mer net lang gezangt,  
Äh Schibb voll Schnee hedd bestimmt.....awwer egal!

Die Musik speel dem geistische Tiefflieger zur Ehr,  
sei froh, das die Reerer sinn so fair!!!!

## Schluß

So, jetzt langts, das wär mol wirrer erledigt,  
 das war jo länger wie em Papschd sei Predigt.  
 Hoffentlich hats Eich all gefall,  
 die Kerweredd 05 is mol wirrer gehall.  
 Ich muß mich bei Eich fers zuheere bedanke,  
 unn langsam funn derer Läder wange!

De Strauß, denne müsser mer awwer noch daafe,  
 das ner net unner nem unnbekante rummlaafe.

„No Name“ so sollche heiße,  
 unn das Johr dei Schönheit beweise!!

Edgar, wo bischen, do komm mol her, kriesch ah e Applaus,  
 wie finnschen unsere Kerwestrauß?

Danke, sowas heert mer gern, jetzt wärd die Kerb bestimmt widder Klasse,  
 jetzt kanns Bier laafe in Masse!  
 Das kriener do unne am Stännche so veel wie ner packe,  
 awwer das jetzt jo känner dud abkagge!  
 Do wird blebb unn es Feschd gefeiert bis ner nimmi kenne,  
 unn wehe es dud jetzt jemand häm Renne!

Wie ner gesieh hon is unser Hof jetzt zugeplashedert mit Stäh,  
 dodefor müsse mer uns noch bedange bei de Gemäh!  
 Unn an alle die hon metgehoff das so schä äwe se mache,  
 mer bedanke uns recht herzlich für diese Sache!

Danke an die Familie Nonnnast die uns in ihrer Scheier knibbele hon geloss,  
 sunsch wärs net so schää worr unser geschoss.  
 Danke ah an alle anner Helfer!

Ich wünsche Eich noch veel Spaß  
 unn dun Eich noch schää vegniesche uff derer Gass!  
 Vielleicht bis zum negschde Johr ich will net wedde,  
 awwer vielleicht kann ich de Aachder nochemol iwweredde!

Zum Schluß kummts wie jedes Johr,  
 de Aachder näwer mir kreichd nochemol vor!